

Pauro saro peba owera ie Iesu urubia aboto Tesaronika ato na-irowomidirotiti

¹ Mo masiro Pauro ie, nedi peba titi owera ro neibi ro nisioidiro-birimo Sairasi ra Timoti ra mutu. Nio Iesu urubia iato na-orowomidiro Tesaronika sabowa ato nio aboto nisioidiro-birimo nedi owera ro. Nio imese Abera Godi urubia ie, ibose Abera Naramu Iesu Keriso nou urubia ie.

² Abera Godi, Abera Naramu Iesu Keriso mutu nio neitiro ro wisa tato se ba-miwarebidirotiti-do, ibose neitiro edi miro ro nio niro turi ato aise ba-miamotiti.

Iesu amadi-orowameai-ri urubia wisa imio ri

³ Niramio iato na-orowomidiro, nio sapuwo to eso owera neibi ro aise niarotiti-bimo. Ina neibi ro sirio tau idaibo tanaro modobo ie aise kisioidiro. Mabu nio Godi ro kimibiria auna aise imowaititi, ina nio abato edi nirimagare ro na-owamo nio neito irematiti-dumo, iedi nirimagare ro nio abato iroromai.

⁴ Ina noudo ie nio neibi ro a-nimowabutiti-bimo Iesu urubia abato arua duriomoro ato na-orowomidiro. Mabu nio koko se beda mino to irowotoititi, nio arua urubia aboudo temeteme na-iaurititi-dumo ina koko tau na-iauri-dumo, nio kimibiria aise iamotiti.

⁵ Nio aboto edi tanaro ro na-irorosioidiro-dumo, nio neio ro iwapotaidiro-dioumo ibo Godi ro edi kimeouti tanaro ro, imese tuputupu ia se imeoutiti-die.

Nedi mabu ro noudo ie nio Godi ro masiro nato amadi-iasoro-ri ibo nio modobo ie Godi edi kiwaboi tanaro ro neito aise kodoro. Mabu nio ro koko tau, temeteme na-iauri-dumo, Godi edi kiwaboi tanaro ro nou sapuwo to iaurititi-dumo.

⁶ Godi mea tuputupu dubu e, nou ro tuputupu tanaro se isioidirotiti. Ina noudo ie nio temeteme etio ro imiotiti-dumo, wisa neio aboto Godi ro ama-iwame-ri.

⁷ Nio abora mibo maumo ato na-orowomidiro, ido nio neibi mutu atu se Godi ro mibo aboudo anama-iwagarewado-ri, mabu Godi mea tuputupu tanaro dubu e. Nedi tanaro ro Godi ro nato amadi-isioidiro-ri, Abera Naramu Iesu Adiri sabowa rido edi tau ato namadi-orowapotai-ri. Abera Naramu korowameai tau ato, nou edi pupuwo sowake urio sirio ro neio mutu, era se amadimi-irarubiauti-ri.

⁸ Etio ra ubi tato na-iamo Godi aboto, neio nou ro ubauba wisa ama-imio-ri. Ibose etio ra Iesu edi mea oweru ro ibodoro tato, wisa Abera Naramu ro ama-imio-ri nou korowameai tau ato.

⁹ Neio womu tato womu tato ubauba imese aise ama-iwaititi-ri, Abera Naramu sosoro gabo rido musomuso imese amadimo-oititi-ri, ibose nou edi auna ia pupuwo ro nou aboudo.

¹⁰ Abera Naramu edi tau ato namadi-orowameai-ri, nu edi tarena urubia ro neio ro amadime-emowabu-ri. Imese sirio urubia nou sapuwo to na-gimibiria-rimo ro nou neio ro amadime-emowabu-ri. Nio nedi soirio ro nato ama-orowotoi-ri, Abera Naramu nio ro atu se nato amadime-emowabu-ri. Mabu nedi mea oweru ro neibi ro na-nimowautiti-bimo, nio ro ta-gimibiria-rimo.

¹¹ Ina noudo ie nio sapuwo to neibi ro Godi

sirio tau aise naratorotiti-bimo, nio Godi ro modobo iwaititi ri nu ubi beda sosoro owamo-die nio mea se korowomidiro aboto. Godi edi pupuwo ro neito nio ba-miwarebai, nio abato beda meamea ubi ro iamotiti durupi to isioidiro ri. Nedi meamea ubi ro nio abato iamotiti, mabu nio Iesu Keriso edi mea oweru ro ta-gimibiria-rimo.

¹² Neibi ro nedi kararatoro oweru ro Godi sirio tau aise naratorotiti-bimo, mabu neibi ubi ie arua urubia ro nimo Abera Naramu Iesu masiro kowoubua, nio neio ro kiauri ato. Ibose nio nou ro ama-imowabu-ri. Nedi tanaro sirio ro Abera Godi, Abera Naramu Iesu Keriso mutu, neitiro ro amadi-isioidiro-ri neitiro edi wisa tato nirimagare ro neito.

2

Ubauba ia tanaro dubu ro amadi-owapotai-ri.

¹ Nimo Abera Naramu Iesu Keriso korowameai tau sapuwo to, ibose nimo Godi ro nou aboto kidabuai sapuwo to, nio nou sapuwo to imowauti rie. Mo niramio,

² nirimagare babio, arua urubia ro karasaubuti oweru obodorouti-dioumo. Nedi karasaubuti oweru ro ibo iamo Abera Naramu nedi sopo duriomoro ro neito ta-gorowameai-die. Mea se! Nedi oweru ro neibi oweru to ararapoi rie, ibo Pauro bi aboudo ou-diomo. Kaupoti neibi aboudo ou pua. Nedi karasaubuti oweru ro neio ro erere mino to obodorouti-dumo, idaibo ipusu oweru to, kimowauti oweru to, o peba titi oweru to obodorouti-dumo. Kaupoti idaibo oweru

sapuwo to mibo kimaragoidiro iworohuti
mamo, ibose nou sapuwo to tere eremati mamo!

³ Mea se! Neio edi karasaubuti oweru ro nio
modobo pua kimuruai. Nio modobo pua arua
urubia ro erere mino to kisaubuti.

Mabu Iesu ido to amadi-orowameai-ri, tauo
tanaro teibo kebase amadi-ororosioidiro-ri.
Urubia sirio Godi edi morobise gabo ro neido
amadima-aragarewado-ri, ina iedi dubu ro sabi
auna se na-isebotiti, nu simara sosoro nato
amadi-orowapotai-ri. Nedi dubu ro Godi ro
kebase ta-gemapoi womu tato womu tato
ubauba koweia aboto.

⁴ Imese beda mutu kemowaiibiti tanaro urubia
ro na-isioidiro-dumo, nedi dubu ro neio nou ro
ama-iwaruriauti-ri. Nou auna se
ama-orowiourio-ri, ina beda urio ra, o beda
orora ra, urubia ro na-irorutiti-dumo, neio nou
ro sopu to amadi-iauri-ri. Ina noudo ie nu Godi
edi Tarena Moto ro nato ama-omidiro-ri, nu ibo
ama-eremowabu-ri, 'Mo Godi kaupoti nou se ie,
mo se demowabu-rimo.'

⁵ Mo nio mutu na-nimidirotiti, nio mo ro nedi
dubu ro nou sapuwo to oweru ta-nimowautiti,
nio ro a-emaragoidiro-dumo ra?

⁶ Nio abora umoro ie nedi ubauba dubu ro
korowapotai moro rido etou ro odiobuti. Nu tau
Godi ro keba se ta-gemohodowa, sosoro nato
amadi-owapotai-ri.

⁷ Mabu nedi tau ro nato Godi edi sabi kisebo
tanaro ro piro se tororosioidiro-dumo, ina nedi
sabi kisebo tanaro ro urubia ubi nou ro
imowaititi ubauba tanaro aise isioidiro ri. Ina
nou etu ro odiobuti, saiki ata nu Godi ro gabo
humo rido ama-owatateai-ri.

⁸ Iato tuturu to owamo-ri pua, nedi ubauba ia tanaro dubu urubia ro sosoro nato amadimo-owea-ri. Kaupoti Abera Naramu Iesu namadi-ou-ri, nedi ubauba ia tanaro dubu Iesu ro ama-atodai-ri, iato nu masiro aise ama-oroporeai-ri. Nou ro Iesu nama-owea-ri beneniobenenio se namadi-orowapotai-ri, nu edi benenio ro nou ro ama-opia-ri.

⁹ Tauo keba se ubauba ia tanaro dubu nu pupuwo korosa Satani ro ama-omio-ri, nu woko Satani pupuwo to ama-osioidiro-ri. Nou ro erere pupuwo korosa tanaro ama-isioidiro-ri, duriomoro urubia isaubuti rie. Nou ro ibose aborabora tanaro ama-isioidiro-ri.

¹⁰ Nou ro nedi ubauba karasaubuti tanaro sirio ro nama-isioidiro-ri, urubia etio ra urio pamo namadimi-iauri-ri, neio nou ro idaibo mino to ama-imatigi-ri. Nedi urubia ro urio pamo amadimi-iauri-ri mabu neio ubi tato keba se goi-rimo morobise owera ibodoro ri. Neio ro nedi morobise owera ro kimibiria rasiri ie, neio Godi ro ubauba aboudo ba-giapopo-ro.

¹¹ Neio ubi tato goi-rimo kamade ro kiwati Godi edi morobise owera ro nou sapuwo to. Ina noudo ie neio Godi ro ubi imaremo bagea karasaubuti owera aise imibiria ri. Neio ro nedi karasaubuti owera ro namadimi-imibiria-ri

¹² neio Godi ro koto aise ama-iwai-ri ina ubauba wisa ama-imio-ri. Mabu nedi urubia ro neio ro morobise owera Iesu sapuwo to imibiria pua, ubauba tanaro kisioidiro sapuwo to kamade auna se erematiti-dumo.

Kimibiria maumo ato koko se dorowotoi

¹³ Mo niramio, Abera Naramu ro nirimagare na-imatiti, neibi ro eso ower a nio sapuwo to aise niarotiti-bimo, ina neibi ro modobo ie idaibo tanaro sirio tau aise kisioidiro. Mabu Godi ro duriomoro ido to gosioidiro, nio nou ro nato gihodowa ubauba aboudo iapopo ri. Nio Tarena Urio ro tarena ia tiwaititi, ina nou edi woko ro neito nio Godi ro nato giapopo-ro. Ibose nio na-imibiria-dumo morobise ower a Iesu sapuwo to, nio Godi ro ubauba aboudo neito giapopo-ro.

¹⁴ Neibi ro nedi mea ower a ro na-nimowautiti-bimo, nio Godi ro neito girapoi-ro. Mabu Godi ubi ie nio awawo to orowomidiro ri, nimo Abera Naramu Iesu Keriso Adiri sabowa ato beda sosoro omidiro-die auna to.

¹⁵ Ina noudo ie niramio koko se ba-dorowotoi, neibi ro keba se beda kitamudiro niwou-birimo, koko se dirobidiro-mo. Neibi matagoro rido beda ower a ro gosuruwo-rimo, ibose nio aboto beda peba ower a nisioidiro-birimo, nou se ba-dibodoro-mo.

¹⁶⁻¹⁷ Nimo Abera Naramu Iesu Keriso nakara se nou se ie, nimo Abera Godi mutu, neitiro ro nio pupuwo aise ba-mimowaititi-do meamea tanaro kisioidiro sapuwo to, ina sirio tau mea ower a se korowauti urubia aboto. Godi auna nirimagare ie nimo aboto, nou edi wisa tato nirimagare ro nou maumo ato, nimo nou ro pupuwo womu tato se aise nimowaititi, ibose nimo nou ro umoro ti-niwaititi-die ibo nimo womu tato keremiro anamadimo-owe a-ri.

Neibi sapuwo to aise ba-dararatorotiti-mo

¹ Niramio, neibi aboudo iana ower a nou e. Neibi sapuwo to Godi imese tau aise ba-dararatoro-mo, mea ower a Abera Naramu sapuwo to hio to korobodorouti aboto sirio duriomoro to, ina urubia sirio ro mea se imade ri, nio abato beda sosoro gororosioi diro-rimo.

² Neibi sapuwo to Godi nio ro sirio tau aise ba-dararatoro-mo, neibi nou ro ubauba urubia aboudo kiwasiouti-bi modobo ie. Mabu arua urubia neio kimibiria tato urubia ie.

³ Kaupoti Abera Naramu morobise dubu e, nio nou ro pupuwo ama-iwaititi-ri. Ibose nio nou ro Satani aboudo ama-iwasiouti-ri.

⁴ Neibi umoro ie nio neibi ro beda ower a to nitomu-birimo, nio ro tanaro durupi to aise isioi dirotiti-dumo. Ina ido durupi to ibose to amadimi-isioi diro-ri. Nedi umoro ro Abera Naramu aboudo ie.

⁵ Nio edi keremiro ro Abera Naramu ro ba-mimeidirotiti Godi edi nirimagare maumo ro nato orowomidi ro ri, ibose Keriso ro edi koko se kiwotoi tanaro ro nou ibodoro ri.

Pupuwo tato orowomidi ro mamo

⁶ Niramio, Abera Naramu Iesu Keriso nou sosoro gabo ato, nio mo ro a-nimowapotai, pupuwo tato kimibiria urubia aboudo ba-daragarewado-mo. Nedi urubia ro neibi edi kitamuidiro ower a ro neio ro ta-girowidi ro-rimo, kaupoti neio ro mea se ibodoro pua.

⁷ Mabu nio nakara se umoro ta-go-ri-mo, neibi beda sosoro nimidirotiti-bimo, nio idaibo sosoro orowomidi ro rie. Neibi nio abato na-nimidirotiti-bimo, neibi auna se

imaragoidiro-titi pua arua urubia ro
iwarebai-biri, neibi simara tu mutu
nimidiro-bimo.

⁸ Ibose neibi ro arua urubia ohona didi se
ihotiti pua, neio wisa aise nimowametiti-bimo.
Neibi ro duwo saiki awawo woko nou
nisioidiro-titi-bimo simara ohona kowea sapuwo
to ie, mabu neibi ubi tato ie nio ro tu to
kimowahau-bi. Neibi woko nou mabu ato
nisioidiro-titi-bimo, neibi ubi tato ie urubia
kiaserewado.

⁹ Neibi aboudo modobo ie nio kimowapotai
aboto ibo neibi iwarebai-biri. Kaupoti neibi ro
nio kimowapotaiddiro pua. Mabu neibi auna ubi
ie neibi beda mino to nimidiro-titi-bimo, nio
idaibo mino to korowomidiro.

¹⁰ Neibi nio mutu na-nimidiro-titi-bimo, nedi
sabi oweru ro nio neito nitamudidiro-birimo, 'Etio
ra pupuwo tato urubia woko isioidiro tato,
idaibo urubia aise iwarebidiro mamu, neio sogoi
ro kiwati modobo ie.'

¹¹ Neibi ro nedi oweru ro nisioidiro-bimo,
mabu oweru ta-nirowidiro-titi-bimo ibo, nio
abato karaserewado urubia torowomidiro.
Nedi urubia ro arua urubia tanaro mau mo to
punugo aise kiwaumudidiro ie.

¹² Abera Naramu Iesu Keriso aboudo pupuwo
korosa ta-nimidai-birimo idaibo urubia
kimadowerai aboto ibo, 'Nio edi karaserawado
tanaro ro ba-dimeserai-mo. Woko aise
gi-isioidiro-ri ohona nio ro nato kowea ie.'

¹³ Ina niramio, ata oweru nou e nio sapuwo to,
meamea tanaro kisioidiro aboudo aratateawado
mamu.

¹⁴ Nedi peba titi ro nato neibi edi pupuwo
oweru ro beda urubia ro iwaruriauti-dumo,

idaibo urubia nio ro modobo ie kieibimai, neio mutu aradabu mamu. Neio siripo koi modobo ie.

¹⁵ Kaupoti neio nasa rubi to iapoi mamu, nio niramio ie, totomu se kimowauti modobo ie.

Pauro iana owera ie

¹⁶ *Nimo Abera Naramu nakara se nou se ie, miro nou aboudo ororuwotiti-die. Erere tanaro kisioidiro maumo ato sirio tau nio nou ro miro ba-mimiotiti. Abera Naramu Iesu imese sirio tau nio abato ba-mimidirotiti.*

¹⁷ *Ba-diauri-mo! Nedi iana owera ro na-nisioidiro awawo titi to mo ia simara tu sana ie nio ro ieibimai ri. Imese sirio peba titi na-nisioidirotiti, womu ato tu sana mo ro idaibo mino to nisioidirotiti.*

¹⁸ *Abera Naramu Iesu Keriso ro nio imese sirio se wisa tato se ba-miwarebaititi.*

Tareka Buka
Portions of the Holy Bible in the Bamu language of
Western Province, Papua New Guinea
Buk Baibel long tokples Bamu long Niugini

copyright © 2023 SIL Papua New Guinea

Language: Bamu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2026-08-26

PDF generated using Haiola and XeLaTeX on 26 Aug 2026 from source files dated 26 Aug 2026

14d82267-f09c-5d69-a15a-8b9a709122b4